

S T A T U T
BOKELJSKE MORNARICE KOTOR

Kotor, 24. februar 1996. g.

Shodno članu 1, 2 i 3. stav 2. člana 9, 10, 21 i 22 Zakona o udruživanju građana (Sl. list SRCG br. 23/90) Skupština Bokeljske mornarice, održana dana 24. februara 1996. godine, usvojila je

S T A T U T

BOKELJSKE MORNARICE KOTOR

I. NAZIV, SJEDIŠTE I PODRUČJE DJELATNOSTI

Član 1.

Bokeljska mornarica je društvena organizacija sa svojstvom pravnog lica.

Sjedište mornarice je u Kotoru.

Programska djelatnost Bokeljske mornarice prostire se na područje Boke Kotorske.

Istorijski, to je staleška Bratovština u kojoj se kontinuirano čuva tradicija jedne od najstarijih profesionalnih organizacija pomoraca na svijetu, nastala 13. januara 809. godine.

Dan Bokeljske mornarice je 26. juni, dan proglašenja prvog sačuvanog Statuta Bokeljske mornarice iz 1463. godine.

II. GRB, ZASTAVA I PRIZNANJA BOKELJSKE MORNARICE

Član 2.

Grb Bokeljske mornarice je istorijski grb grada Kotora, sa trakom na kojoj je natpis „FIDES ET HONOR“. Oko grba je ispisan naziv: Bokeljska mornarica Kotor.

Pečat Bokeljske mornarice je okrugao i sadrži naziv: Bokeljska mornarice Kotor.

Pečat Bokeljske mornarice je okrugao i sadrži iste elemente kao i grb Bokeljske mornarice.

Štambilj Bokeljske mornarice je pravougaonog oblika, sadrži elemente grba, te evidencijske podatke.

Član 3.

Glavni odred Bokeljske mornarice nastupa sa dvije zastave: jugoslovenskom i zastavom glavnog odreda Bokeljske mornarice.

Zastava glavnog odreda Bokeljske mornarice ima oblik pravougaonika razmjera 1:1,5 m, od bijele je svile sa grbom Bokeljske mornarice. Na strani koplja više dvije crvene trake, širine 12 cm i dužine koja odgovara širini zastave. Na jednoj strani je ispisano zlatnim slovima: Bokeljska mornarica a na drugoj strani: „Fides et Honor“.

Član 4.

Bokeljska mornarica ima svoju svečanu pjesmu čija je jedna od strofa:

Uljezimo svi u kolo,
rukama ruke pružimo,
pokažimo svima okolo,
da slogu bratsku vriježimo.

Na svečanu pjesmu napisana je kompozicija za duvački orkestar, koja prati igru kola Bokeljske mornarice.

Riječi svečane pjesme i njezina muzička kompozicija, prilogu su Pravilnika o odori, činovima i nastupima aktivnog sastava Bokeljske mornarice.

Član 5.

Bokeljska mornarica dodjeljuje:

- a) povelje,
- b) medalje.

Pojedinosti o dodjeli ovih priznanja propisuju se Pravilnikom o poveljama Bokeljske mornarice.

III. NASTUPI GLAVNOG ODREDA BOKELJSKE MORNARICE

Član 6.

Glavni odred Bokeljske mornarice nastupa:

1. Na dan Bokeljske mornarice,
2. Na gradskim svečanostima svetog Tripuna u Kotoru.

Glavni odred Bokeljske mornarice može da nastupi i u svečanim prilikama, po pozivu organizatora i na osnovu odluke Admiraliteta.

Detaljne odredbe o nastupu glavnog odreda sadrži pravilnik.

IV. ZADACI BOKELJSKE MORNARICE

Član 7.

Nastojeći da odredi vjekovni kontinuitet svojih istorijskih tradicija i što bolje ih usaglasi sa savremenim potrebama, Bokeljska mornarica:

1. održava javne nastupe glavnog odreda aktivnog sastava u odorama, sa barjakom, pod starinskih oružjem, uz drevni komand, preuzima ključeve grada Kotora i igra kolo,
2. prikuplja, obrađuje i objavljuje istorijsku građu i radove iz istorije pomorstva, posebno one koji se odnose na Bokeljsku mornaricu. Osim strogo naučnih domena, simpozija i stručnih edicija, radi na popularizaciji tih saznanja u školske, muzeološke i turističke svrhe (posebna izdanja, kasete, vodiči, suveniri, bedževi, značke, predavanja u školama, na tribinama Bokeljske mornarice i sl.),
3. u okviru humanitarnih tradicija Bratovštine brine se posebno za svoje bolesne, ostarjele ili siromašne članove,
4. sarađuje sa preduzećima, ustanovama i organizacijama trgovačke mornarice te školskim, društvenim, stručno naučnim organizacijama koje se bave odgojem i obrazovanjem kadrova za pomorstvo ili djelatnošću vezanom za razvoj pomorstva.

Cjelokupna djelatnost odvija se u tradicionalnom duhu Bokeljske mornarice, zasnovanom na nacionalnom i vjerskom uvažavanju i zajedništvu, izdavanje publikacija i dr.

Član 8.

Radi ostvarivanja svojih zadataka Bokeljska mornarica može biti član i ostalih organizacija i udruženja čiji je cilj i zadatak razvoj i unapređenje pomorstva i njegovih pomorskih tradicija.

V. ČLANSTVO BOKELJSKE MORNARICE

Član 9.

Članovi Bokeljske mornarice su:

- redovni član,
- član pomagač,
- zaslužni član,
- počasni član.

Član 10.

Redovni član je lice koje prihvata Statut Bokeljske mornarice i aktivno radi u nekoj Podružnici Bokeljske mornarice i plaća članarinu.

Član 11.

Član aktivnog sastava je redovni član, koji kao pripadnik odreda Bokeljske mornarice, u tradicionalnoj odori i pod oružjem sudjeluje u nastupima Bokeljske mornarice, u skladu sa Pravilnikom o odori, činovima i nastupima aktivnog sastava Bokeljske mornarice.

Mornare aktivnog sastava predlažu Podružnice Bokeljske mornarice, a imenuje iz Admiralitet.

Imenovanje u zvanje čin mlađeg oficira i oficira aktivnog sastava, zaključno sa prvim kapetanom, provodi Admiralat na svoju inicijativu ili na prijedlog Podružnice Bokeljske mornarice.

Prvog i drugog majora, vice admirala i admirala imenuje Skupština na prijedlog Admiralata.

Imenovanim mornarima i licima u zvanju, odnosno činu izdaje se pismeno rješenje.

Članovima aktivnog sastava izdaje se članska knjižica u koju se upisuju matični podaci i čin, odnosno funkcija u Bokeljskoj mornarici.

Član 12.

Članom pomagačem postaje pravno ili fizičko lice koje priložima ili plaćanjem određenog doprinosa pomaže Bokeljsku mornaricu.

Najmanji iznos članarine za člana pomagača određuje Upravni odbor.

Članove pomagače imenuje Upravni odbor Bokeljske mornarice na prijedlog Podružnica, odnosno Društva.

Članu pomagaču se izdaje rješenje.

Član 13.

Zaslužnim članom postaje redovan član ili član pomagač koji se posebno zalaže u ostvarivanju programskih zadataka Bokeljske mornarice.

Zaslužne članove imenuje Upravni odbor Bokeljske mornarice, a potvrđuje Skupština.

Zaslužnim članovima izdaje se Povelja Bokeljske mornarice u skladu sa Pravilnikom o Povelji Bokeljske mornarice.

Član 14.

Počasnim članom postaje pravno ili fizičko lice kojemu je priznata posebna zasluga u ostvarivanju zadataka Bokeljske mornarice ili na unapređivanju pomorstva.

Počasni član može biti predstavnik prijateljske zemlje za kojeg Admiralitet ili Upravni odbor Bokeljske mornarice ocijeni da takvu čast zaslužuje.

Počasne članove, na prijedlog Admiraliteta ili Upravnog odbora, proglašava Skupština. Počasnim članovima dodjeljuje se Povelja, a u skladu sa Pravilnikom o povelji Bokeljske mornarice.

Član 15.

Počasnim oficirom Bokeljske mornarice sa odgovarajućim činom u pravilu može postati plan aktivnog sastava ili redovan član koji ima naročite zasluge u organizaciji i radu Bokeljske mornarice.

Počasni oficir van aktivnog sastava, može postati izuzetno zaslužna ličnost za koju Admiralat ili Upravni odbor Bokeljske mornarice ocijeni da takvu čast zaslužuje.

Lice iz aktivnog sastava Bokeljske mornarice, koje se zbog reizbornosti ili opravdanih ličnih razloga nakon reizbornosti ne imenuje u određeni čin, odnosno zvanje, prevodi se u odgovarajući počasni čin, odnosno zvanje, a koje su svojom aktivnošću pokazale da to zaslužuju.

Prijedlog za izbor u počasni čin ili viši čin, odnosno zvanje, vrši Admiralat što potvrđuje Skupština Bokeljske mornarice.

Počasnom oficiru dodjeljuje se povelja u skladu sa Pravilnikom o povelji Bokeljske mornarice.

Član 16.

Odluku o imenovanju u počasni čin admirala ili vice admirala donosi Skupština na prijedlog Admiralata ili Upravnog odbora Bokeljske mornarice.

Počasnom admiralu ili vice admiralu, dodjeljuje se povelja u skladu sa Pravilnikom o povelji Bokeljske mornarice.

Član 17.

Lice aktivnog sastava Bokeljske mornarice u činu admirala i vice admirala, koje se zbog reizbornosti ili opravdanih ličnih razloga ne imenuje ponovo za admirala Bokeljske mornarice u pravilu se prevodi u počasnog admirala ili vice admirala.

Odluku o imenovanju u počasni čin admirala ili vice admirala donosi Skupština na prijedlog Admiralata Bokeljske mornarice.

Počasnom admiralu odnosno vice admiralu dodjeljuje se povelja u skladu sa Pravilnikom o povelji Bokeljske mornarice.

Član 18.

Svake godine dana 13. januara održava se sjednica Admiralata na kojoj se potvrđuju ili mijenjaju prijedlozi za sve aktivne članove i malog admirala za tekuću godinu u vezi reizbornosti, što je podložno konačnoj odluci Skupštine.

VI. PRAVA I DUŽNOSTI ČLANOVA BOKELJSKE MORNARICE

Član 19.

Prava i dužnosti članova Bokeljske mornarice su:

- da sudjeluje u radu Skupštine pri donošenju odluka, zaključaka i smjernica za rad Bokeljske mornarice,
- da aktivno sudjeluje u radu Bokeljske mornarice u svim pitanjima njezinog programa,

- da sudjeluje u radu Skupštine pri donošenju Statuta Bokeljske mornarice, njegovih izmjena i dopuna i ostalih akata Bokeljske mornarice,
- da bira i da bude biran u sve organe Bokeljske mornarice,
- da bude imenovan u odgovarajući čin, odnosno zvanje aktivnog sastava Bokeljske mornarice,
- da predlaže prijem i opoziv članova u organe Bokeljske mornarice,
- da istupa iz članstva po vlastitoj želji, odnosno ako bude isključen iz članstva da se žali Sudu sedmorice koji donosi konačnu odluku,
- da bude redovno i na vrijeme obavještavan o radu i poslovanju Bokeljske mornarice,
- da iznosi mišljenje i daje prijedloge za unapređenje rada Bokeljske mornarice.

Članstvo prestaje:

- smrću,
- samovoljnim napuštanjem,
- odbijanjem plaćanja članarine,
- isključenjem.

Član se isključuje ako je njegov rad protivan odredbama Statuta i drugih akata Bokeljske mornarice ili je protiv njega donijeta pravosnažna sudska presuda za krivično djelo.

VII. ORGANI BOKELJSKE MORNARICE

Član 20.

Organi Bokeljske mornarice su:

- Skupština,
- Admiralat,
- Upravni odbor,
- Aktivni sastav,
- Nadzorni odbor,
- Ostali odbori i
- Sud sedmorice.

A. SKUPŠTINA BOKELJSKE MORNARICE

Skupština je najviši organ Bokeljske mornarice, a sačinjavaju je: Admiralat (11 članova), po dvadeset predstavnika svake Podružnice Bokeljske mornarice i po jedan predstavnik članova pomagača.

Članovi Skupštine biraju Predsjedništvo koje rukovodi Skupštinom.

Mandat članova Skupštine traje četiri godine i mogu biti ponovo birani.

Počasni admirali, vice admirali i oficiri, počasni zaslužni članovi prisustvuju Skupštini kao gosti.

Član 21.

Redovna skupština održava se svake četiri godine, a vanredna po odluci Amiralata i Upravnog odbora ili na zahtjev najmanje jedne Podružnice.

Skupštinu saziva Upravni odbor.

Skupština punopravno zasijeda ako je prisutna prosta većina članova Amiralata, Upravnog odbora i predstavnika svake Podružnice, a odluke i zaključke donosi prostom većinom prisutnih.

Član 22.

Skupština Bokeljske mornarice:

- Usvaja Statut Bokeljske mornarice i odlučuje o njegovim izmjenama i dopunama,
- Usvaja program rada Bokeljske mornarice,
- Usvaja Pravilnike Bokeljske mornarice,
- Daje saglasnost na Statut Podružnica Bokeljske mornarice,
- Bira predsjednika i dva potpredsjednika Upravnog odbora,
- Bira nadzorni odbor i ostale odbore,
- Imenuje aktivnog i počasnog admirala, vice admirala, prvog i drugog majora,
- Odlučuje o imenovanju počasnih članova, počasnih oficira.

B. ADMIRALAT

Član 23.

Admiralat sačinjava 13 lica i to: Admiral, viceadmiral, I major, II major, I kapetan, II kapetan, ađutant admirala, komandant odreda Kotor, komandant odreda Tivat, komandant odreda Herceg Novi, kolovođa, predsjednik Upravnog odbora Bokeljske mornarice i lučki kapetan Kotor.

Član 24.

Admiralat obavlja sve poslove koji su u vezi sa aktivnim sastavom Bokeljske mornarice te one poslove koje odredi Skupština.

Za vrijeme sjednica Admiralata zapisnik vodi sekretar Bokeljske mornarice.

Član 25.

Čast admirala, vice admirala, prvog i drugog majora i svih oficira, te ađutanta, glavnog kolovođe i njegovih zamjenika i barjaktara Bokeljske mornarice, traje četiri godine i mogu biti ponovo birani.

Član 26.

Admiralat Bokeljske mornarice predlaže Skupštini imenovanje u čin odnosno počasni čin i razriješenje dužnosti admirala, vice admirala, prvog i drugog majora na vlastitu inicijativu ili na prijedlog Upravnog odbora, odnosno Podružnice.

Admiralat donosi program rada koji proizilazi iz opšteg programa rada Bokeljske mornarice.

Admiralat takođe:

- odlučuje o vanrednim nastupima glavnog odreda vezanim za član 6. ovog Statuta, imenuje mornare u čin mlađeg oficira odnosno prevodi ih u počasni čin, zaključno sa činom prvog kapetana,
- odlučuje o dodijeljivanju priznanja Bokeljske mornarice na prijedlog Upravnog odbora ili podružnice,
- odlučuje o imenovanju komandira odreda podružnice na osnovu prijedloga Upravnog odbora ili podružnice,
- odlučuje o imenovanju članova Bokeljske mornarice izvan aktivnog sastava u čin počasnog oficira, odnosno mlađeg oficira na osnovu prijedloga podružnice ili Upravnog odbora,
- imenuje i razriješava ađutanta Bokeljske mornarice,

- sva imenovanja i razrješavanja donose se u skladu sa Pravilnikom o odori, činovima i nastupima aktivnog sastava Bokeljske mornarice.

Član 27.

Admiralat imenuje malog admirala koji u odori mornara Bokeljske mornarice simbolizuje podmlađivanje i napredak Bokeljske mornarice.

Čast malog admirala traje godinu dana.

Mali admiral učestvuje u proslavi zajedno sa admiralatom u skladu sa Pravilnikom u odori, činovima i nastupima aktivnog sastava Bokeljske mornarice.

Član 28.

Ađutant prati admirala u nastupima glavnog odbora, a naročito kada negdje javno zastupa Bokeljsku mornaricu.

Ađutant vodi imenik mornara i oficira sa podacima o mjestu zaposlenja, adresama i telefonima tega precizno dopunjuje ili mijenja prema odlukama Admiralata. Takav kompletan imenik izlazi svake godine od 1. do 12. januara u Domu Bokeljske mornarice.

Ađutant vodi posebnu knjigu u kojoj su zabilježeni svi oficiri koji su uzeli učešća tokom godine uz opis obavljenog nastupa.

U saradnji sa upravom podružnice i komandirima odreda podružnica brine o pravovremenim dostavama poziva mornarima i oficirima za svaki nastup.

C. UPRAVNI ODBOR

Član 29.

Upravni odbor Bokeljske mornarice sastoji se od 18 članova i to: Predsjednika, dva potpredsjednika, sekretara, admirala, vice admirala, predsjednika podružnice Kotor, Tivat i Herceg Novi, predstavnika „Jugooceanije“ Kotor, predstavnika MTRZ Tivat, predstavnika Jadranskog borodgradilišta Bijela, predstavnika Fakulteta za pomorstvo Kotor, predstavnika Istorijskog arhiva i predstavnika Pomorskog muzeja Kotor, predstavnika opštine Kotor, Tivat i Herceg Novi.

Rad Upravnog odbora reguliše se Poslovníkom.

Odluke se donose većinom glasova od ukupnog broja članova.

Upravni odbor radi ako je prisutna većina članova.

Član 30.

Upravni odbor se bira na četiri godine.

Članovi Upravnog odbora mogu biti ponovo birani.

Upravni odbor saziva predsjednik, a mora biti sazvan ako to zahtijeva većina članova Upravnog odbora.

Član 31.

Upravni odbor Bokeljske mornarice obavlja sljedeće poslove:

- rješava pitanja koja nijesu isključivo stavljana u zadatak Skupštine ili Admiralata,
- usvaja godišnji plan i program rada kojim se razrađuje program rada usvojen na Skupštini,
- usvaja finansijski plan i izvještaj o finansijskom poslovanju,

- predlaže Admiralatu imenovanje i razriješenje admirala, vice admirala, prvog i drugog majora Bokeljske mornarice,
- predlaže Admiralatu imenovanje počasnih oficira,
- imenuje sekretara i blagajnika Bokeljske mornarice,
- predlaže Admiralatu dodjelu priznanja Bokeljske mornarice na svoju inicijativu na inicijativu Podružnice,
- imenuje članove pomagače,
- predlaže Skupštini počasne i zaslužne članove,
- u dogovoru sa Podružnicama određuje visinu članarine i postotak koji ostaje Podružnicama.

D. AKTIVNI SASTAV BOKELJSKA MORNARICE

Član 32.

Aktivni sastav Bokeljske mornarice sačinjavaju Admiralat i odredi Podružnica Bokeljske mornarice.

Glavni odred Bokeljske mornarice čine odredi svih Podružnica.

Glavnim odredom komanduje prvi major Bokeljske mornarice, a odredom Podružnica komandir odreda.

Zvanja u aktivnom sastavu Bokeljske mornarice su:

- Komandir Glavnog odreda,
- Komandir odreda Podružnice i
- Ađutant.

Glavni odred Bokeljske mornarice nastupa u skladu sa Pravilnikom o odori, činovima i nastupima aktivnog sastava Bokeljske mornarice.

U nastupima Glavnog odreda Bokeljske mornarice u sastavu odreda mogu nastupiti i počasni admirali, vice admirali i počasni oficiri Bokeljske mornarice u odorama.

Član 33.

Činovi oficira aktivnog sastava su:

- Admiral,
- Vice admiral,
- Prvi i drugi major,
- Prvi i drugi kapetan,
- Prvi i drugi poručnik i
- Poručnik.

Činovi mlađih oficira Bokeljske mornarice su:

- Vodnik,
- Mlađi vodnik.

Zvanja u aktivnom sastavu Bokeljske mornarice su:

- Glavni barjaktar i njihovi zamjenici,
- Glavni kolovođa i zamjenici.

Broj oficira i mlađih oficira po činovima određuje Admiralat.

Član 34.

Sjednicama aktivnog sastava u pravilu prisustvuju članovi Admiralata, oficiri i mornari, a po potrebi i članovi Upravnog odbora, ako dnevni red to zahtijeva.

Član 35.

Odoru, činove, međusobne odnose, organizaciju i nastupe aktivnog sastava Bokeljske mornarice bliže reguliše Pravilnik o odori, činovima i nastupima aktivnog sastava Bokeljske mornarice.

Pravilnik donosi Skupština na prijedlog Admiralata, a uz saglasnost Upravnog odbora.

E. NADZORNI ODBOR

Član 36.

Nadzorni odbor sastoji se od tri člana i tri zamjenika.

Članovi nadzornog odbora nadziru rad Bokeljske mornarice i njenih organa, a posebno finansijsko poslovanje.

Odbor je dužan najmanje jedan put godišnje pregledati poslovanje i podnijeti pismeni izvještaj Upravnom odboru, Skupštini Bokeljske mornarice, prilikom njenog redovnog zasijedanja.

Zapisnik o radu nadzornog odbora vodi sekretar Bokeljske mornarice.

F. OSTALI ODBORI

Član 37.

Ostali odbori mogu biti stalni ili privremeni.

Odborom rukovodi predsjednik odbora, a u njegovoj prisutnosti zamjenik.

Stalni odbori su:

- Odbor za njegovanje pomorskih, kulturnih i umjetničkih tradicija Bokeljske mornarice,
- Odbor za rad sa podmlatkom Bokeljske mornarice (djelovanje u školstvu).

Privremeni odbori se zasnivaju prema potrebi radi rješavanja posebnih zadataka.

Rad odbora reguliše se Pravilnikom koji donosi Upravni odbor Bokeljske mornarice.

G. SUD SEDMORICE

Član 38.

Sud sedmorice rješava sve sporove nastale u Bokeljskoj mornarici kao i žalbe i prigovore pojedinih članova zbog nepravilne primjene Statuta.

Sud sedmorice se sastoji od: admirala, vice admirala, prvog majora, predsjednika Upravnog odbora te predsjednika podružnica Kotor, Tivat i Herceg Novi.

Rješenja suda sedmorice su punovažna i konačna.

Zapisnik zasijedanja sud sedmorice vodi sekretar Bokeljske mornarice.

Član 39.

Sekretar Bokeljske mornarice je lice koje vodi zapisnike Skupštine, Admiralata, Upravnog odbora, Suda sedmorice i raznih odbora.

Stara se o svim administrativnim i finansijskim poslovanjima.

Sekretar može biti plaćeno lice u Bokeljskoj mornarici dok su sve ostale funkcije počasne.

VIII. PODRUŽNICE BOKELJSKE MORNARICE

Član 40.

Bokeljska mornarica radi ostvarivanja svojih ciljeva i izvršavanja zadataka okuplja članstvo u Podružnicama.

Podružnice se osnivaju na području opština Boke Kotorske.

Podružnice na svojoj skupštini biraju upravu koja se sastoji od predsjednika, potpredsjednika, sekretara, blagajnika, domaćina, komandira i barjaktara.

Član 41.

Rad uprave podružnice odvija se prema Poslovniku kojeg donosi uprava podružnice, a potvrđuje Upravni odbor Bokeljske mornarice.

Za vrijeme sjednice vodi se zapisnik koji se u jednom primjerku dostavlja sekretaru Bokeljske mornarice.

Član 42.

Podružnice sa područja Boke Kotorske od svojih članova aktivnog sastava mogu formirati odredi Podružnice, u skladu sa Pravilnikom o odori, činovima i nastupima aktivnog sastava Bokeljske mornarice.

Odredom komanduje komandir odreda.

Za formiranje odreda potrebno je najmanje 10 mornara.

Član 43.

Podružnice imaju svoje Statute koji ne mogu biti u suprotnosti sa odredbama ovog Statuta i drugim pravilnicima Bokeljske mornarice.

Podružnice imaju svojstvo pravnog lica.

Član 44.

Pored učestvovanja u glavnom odredu Bokeljske mornarice, podružnice mogu slaviti i dan podružnice i druge značajne datume koje usvoji Skupština podružnice, a prihvati Admiralat.

Odredi aktivnog sastava podružnica u prigodnim svečanostima mogu u svom mjestu nastupati samostalno, a u skladu sa Pravilnikom o odori, činovima i nastupima aktivnog sastava Bokeljske mornarice, ali uvijek uz dozvolu Admiralata.

Član 45.

U posebno svečanim prilikama, kada je pozvana Podružnica Bokeljske mornarice, ova se može odazvati i bez prisustva čitavog odreda i bez protokola, sa manjom grupom mornara i oficira u nošnjama, za što je potrebna saglasnost Admiralata, a za disciplinu grupe odgovara oficir.

Član 46.

Pri nastupanju odreda podružnice u sastavu Bokeljske mornarice, nosi se i jugoslovenska zastava.

Zastava odreda Podružnice Bokeljske mornarice ista je kao i glavnog odreda Bokeljske mornarice. Na jednoj traci je ispisano Bokeljska mornarica, a na drugoj podružnica i mjesto sjedišta.

IX. MATERIJALNO FINANSIJSKA SREDSTVA BOKELJSKE MORNARICE

Član 47.

Materijalno finansijska sredstva Bokeljske mornarice proističu iz:

- doprinosa od članarine,
- doprinosa od članova pomagača,
- zavještanja, poklona i dobrovoljnih priloga,
- djelatnosti Bokeljske mornarice,
- doprinosa društvenih fondova.

Član 48.

Bokeljska mornarica može obavljati privrednu i društvenu djelatnost u skladu sa pozitivnim propisima i programom rada.

X. PRELAZNE I ZAVRŠNE ODREDBE

Član 49.

Bokeljsku mornaricu pred državnim organima i drugim institucijama i organizacijama predstavlja Admiral Bokeljske mornarice, a u njegovoj odsutnosti predsjednik Upravnog odbora Bokeljske mornarice.

Član 50.

Znamenja Bokeljske mornarice su autorski zaštićena.

Član 51.

Organizacija i rad Bokeljske mornarice uskladiće se sa odredbama ovog Statuta u roku od šest mjeseci od dana njegovog stupanja na snagu.

U isto vrijeme – roku, podružnice Bokeljske mornarice će uskladiti svoje Statute sa odredbama ovog Statuta.

Član 52.

Stupanjem na snagu ovog Statuta prestaje da važi Statut Bokeljske mornarice usvojen na Skupštini 5. septembra 1991. godine.

Član 53.

Tumačenje odredaba ovog Statuta i drugih Pravilnika daje Skupština Bokeljske mornarice.

Član 54.

Akta Bokeljske mornarice potpisuju lica iz člana 49. ovog Statuta u okviru predviđene nadležnosti.

Član 55.

U slučaju prestanka rada Bokeljske mornarice, njena imovina pripada Pomorskom muzeju Kotor.

Član 56.

Ovaj Statut stupa na snagu danom usvajanja na Skupštini Bokeljske mornarice.

SKUPŠTINA BOKELJSKE MORNARICE
KOTOR